



Tir Yimyim

www.tirymyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tirymyim@gmail.com

TAPAK 6

Yangia anidakangma :



Tir Yimyim



tir_yimyim



tir yimyim

TAPAK 8

Indo-Myanmar arrtsü atsütsü sentong
aliba Mizoram-i magizüker

Fenerbahce-i Jose Mourinho
mapa nungi anentsüogo

VOL. XXII ISSUE NO. 316 (ADOK 316)

DIMAPUR

KÜPTOKNÜ (SATURDAY)

LUROI (AUGUST) 30, 2025

₹ 5.00

KPC ajanga KPC-NBOCW WB Media Fellowship atema nübu shimogo

Dimapur, Luroi/August 29 (TYO): Kohima Press Club (KPC) ajanga 4 buba Kohima Press Club and Nagaland Building & Other Construction Workers Welfare Board (KPC-NBOCW WB) Media Fellowship for Journalists 2025 asoshi Fellows shimba tenüngtem sangdongogo.

Parnokji The Morung Express (Kohima) nungi Chizokho Vero, Nagaland Tribune (Noklak) nungi Shongmo B aser The Morung Express (Mokokchung) nungi Yarden Jamir alitsü.

Iba fellowship program nung shilem ka ama KPC-

NBOCW WB Fellows temi Nagaland nung kisü-jensüba industry nung ajangshiba aser timtem ajurubatem otsü tarok zülua September 5 nungi November 15, 2025 tashinung adoktsü.

KPC ajanga NBOCW WB den lungjemer shimteta aliba fellows atema orientation workshop ka September 1, 2025 nü Kohima Press Club office, APO Building, Phoolbari, Kohima nung alitsü.

Iba sentong nung shimteta aliba fellows den KPC züngsem ajak arua adentsü KPC sangdong ajanga ayongzüka liasü.

NMSA longkak ait tenzüker

Dimapur, Luroi/August 29 (TYO): Nagaland Medical Students' Association (NMSA) ajanga Kohima nung aliba Department of Health and Family Welfare kima August 30 nü yimjung nung longkak ait tenzüksü, ta metetdaksüogo.

Departmental screening committee ajanga Department of Health and Family Welfare nung contractual posts 280 regular akumba indang sorkari August 18, 2025 nü sangdong agütsüba nung langzüa longkak ya aittsü, ta parnoki ashi.

Iba mera ya nübu shimba yimya aser constitutional

provisions nung aibelenba lir aser merit nung ajemdaker nübu shimba yimya samatsür, ta NMSA-i tai tongloktsür.

Iba ama tapi agi telemtetba agiba ajanga state nung public health services lendongi yoker, ta ashi.

Temsüa aliba nübu tem tejangraba wazüka ayutsü atema ozüng nung aliba ama ochishia nübu tetemsü shimtsüla, ta ashi.

NMSA ajanga kaketshir tentet, NGOs, CSOs aser nüburtem dang iba democratic movement nung adentsü ayongzüka liasü.

Frontier Nagaland Territory ken o tatemleni arur: CM Rio

Dimapur, Luroi/August 29 (TYO): Frontier Nagaland Territory (FNT) ken o tangatetep leni arur, ta Chief Minister Dr. Neiphiu Rio-i Hokulbarnü ashi.

Kohima nung sentong ka agiba mapang, tawa New Delhi nung central sorkar lenirtem den senden amenba nung Northeast atema home secretary aser joint secretary densema Ministry of Home Affairs (MHA) nungi delegates den tatsü-talang ajak jembi, ta pai metetdaksü.

Iba sülen pa Delhi-i aoba mapang Union Home Minister küna kisüng ajuruteptsü sentong lir ta ashi. "State tsütsü nungi asenoki asen tangatetba jangjatepogo, anungji tatem kati

arutsü asoshi tangbo parnok dak keta lir," ta pai ashi.

Ano CM-i Northeast region nung handloom aser handicrafts sector nung pa convener asütsü mapa nungloktsü ta ashi, kong danga state indang chief minister tem aser DoNER minister züngsem ama alitsü. Iba sector tsütsü Nagaland tajungba nung tejakleni aoba mechi mapa mapa nungloktsü südi ta amanger, ta Rio-i ashi.

Züngsem state nungi submissions aser analysis ya October nungi tenzüksü imlar, ta pai ashi.

Pai textile designers aser experts tem alitsüba, designs atema tribal hohos aser tetsür lokti tentet nungi temelaba

agütsüba sentongtem lemsatep.

Quality control aser jenjang ateta azüoktsü asoshi yarn banks lapoktsüba indanga Rio-i ashi. "Nüburtemi yarn bank nungi yarns alitetsü, koba ajanga quality kisüng masü saka jenjang junga meittsü. Iba ya ajanga commercial scale nung production tenzüksü," ta pai ashi.

Iba indang jembishinüba mapang lir aser Northeast states ajunga nungi proposal agüja asadanger ministry teyari nung policy renemtsü, ta ashi.

Südaker tem sen tajungba aazüka ibaji ajanga pei sasa pei peria alitsü asoshi südakba nung nisung timbai temulung agütsüdaksütsü nükjidong nung iba ya inyaksü, ta CM-isa ashi.

Mapa meranga inyaker mezüngmeshi tesü: DUCCF

Dimapur, Luroi/August 29 (TYO): Dimapur Urban Council Chairmen Federation (DUCCF) ajanga sorkar dang Nagaland RMSA Teachers' Association (NRMSTA) 2016 batch-i akhangba angadanga parnoki akhangba ama inyaksü ayongzüka liasü.

RMSA kübok 2016 küm shimba tesayurtem indang itasen soita ayuba ya tim masü aser Court mezüngmeshiba lir, shirnok Gauhati High Court indang division bench ajanga March 16, 2022 nung medentsür aser Supreme Court-ia May 20, 2025 nung kasa

temeden agüja lir.

Ibai tesayurtem bendanga agütsür meranga inyakba mezüngmeshi lir, shirnoki pei asoshi mebilemi meranga tenzüka arur. Parnok 'pen down strike' tenzüka ajanga state nung government schools 133 aser yangi kaketshir meyrirjang aika dak kongshitsü, shirnok tarutsü nükla lir, ta DUCCF ajanga ashi.

Mapa shidak inyakba sorkar employees nem sorkari taa shidak agütsütsüla. Kasa mapa inyaker kar nem taa tajemba aser kar nung timba magütsütsüla.

Ibai tashiyim amshiba

maparen ka lir, kechiaser parnoki memulungseti iba mera ya agütsüba akumer.

Legal tsütsü nungi benteter aliba ya mapa kuma inyaksüla aser judiciary mezüngmeshi masütsüla, ta DUCCF sangdong ajanga ashi.

NRMSTA 2016 batch puri parnok mapa nung aniokba 2016 küm nungi tenzüka itasen aser service benefits shidak agüja 2010-13 SSA-RMSA tesayur den sako ROP 2017 pay scale den annual incrementa agütsütsü akhanger. Ano April 2025 nungi parnok nem itasen magütsüba meshir.

Political Affairs Committee senden ayonger

Dimapur, Luroi/August 29 (TYO): Political Affairs Committee aser MLAs ajunga senden ka September 1, 2025 nikongdang 2:00 ako nungi tenzüka State Banquet Hall, Chief Minister's Residential Complex, Kohima nung mena Naga Political issue dak sendakba tongtipang ken o ajunga reprangshia jembishinü akatsü, ta Home Department, Political Branch sangdong ka nung metetdaksü.

Iba senden nung Chief Minister, Deputy Chief Ministers, Speaker aser Deputy Speaker adentsü.

Ministers/ MP Rajya Sabha /MP Lok Sabha / Advisors aser MLAs ajunga iba densen nung adentsü ayongzüker, ta sangdong ajanga ashi.

NSF dang Naga nunger lungjemba nung shilem agütsü ayongzüker



NSF ketdangpurtem tasenpur noksa

Dimapur, Luroi/August 29 (TYO): Hokulbarnü Arunachal Pradesh legislator Laisam Simai-i Naga Students' Federation (NSF) dang Naga nunger lungjemtsü asoshi shilem tulu agütsü ayongzüker.

Tseminyu nung NSF indang 31 buba Inti Mungdang valedictory session nung jembidang, federation ya kaketshir tentet ka dang masü saka Naga nunger lenirtem lir, ta Simai-i ashi.

Federation-i 'internal welfare' alema oa rangloktsüla aser sorkar agencies aser danga lokti tentet

balala den teka amteper employment asoshi inyaksüla, ta MLA Simai-i ashi.

Simai-i lanurtem dang pei tera nung teti sendaktepa alitsü aser tesüba lenirtemi bendanga agütsüba kodanga mamadoktsü ayongzüka liasü.

NSF ketdangpur tasen shimba nung tetsür kata maliba indang pai tuteta ashi aser tarutsü nungbo tetsür shilem agidaksütsü ayongzüka liasü.

Kasa sentong nung Advisor to chief minister & Chairman, IDAN, Abu Metha-i jembidang, NSF ya Naga nunger asoshi

akang-akanga nokdaka aruba institution ka lir, ta ashi.

"Naga nunger külemi ka ama nokdaksü aser takok angutsü nükjidong ayutsüla. Lanurtemi takok anguba ajanga Nagaland ya tanü dang nungi asüng tajungba kumdaksütsü," ta pai NSF lenir tasentem ayongzüka liasü.

Kasa mapang 1947 küm NSF tenteter tang mezüngbuba Zeliangrong kin nungi tir inyaksü shimogo.

All Zeliangrong Students' Union nungi Mteisuding ya NSF 2025-2027 kümsük asoshi tir inyaksü Hokulbarnü federation indang general election nung shima liasü.

Vote 34 nungi pai vote 14 nguteta All Sumi Students' Union (Sumi Kiphimi Kuqhakulu) nungi Ineka Z Awomi (votes 12), Ao Kaketshir Mungdang nungi Benjong Longchar (votes 6) aser Lotha Students' Union nungi Chumben (votes 2) nunger madak takok ngua liasü.

NSF ketdangpurtem tasen

shimba nungya vice president Vimeyiekho Vitso, general secretary Kenilo Kent, assistant general secretary Veze Tunyi, secretary (social and culture) Thejalkhoukho Thomas Khawakhrie, secretary (education) Ajo Tsela, secretary (finance) Katho P Awomi, secretary (publicity and information) Temjentoshi aser federal assembly indang speaker Marik O Leriina nungertem alitsü.

NSF tir tasenba Mteisuding-i Naga nunger aser federation units temi pa dak tamang akaba asoshi pelaba lemsatep aser ochimashi anema nokdaksü, lanur tashi aser telungjem asoshi inyaksü nangzüka liasü.

Mteisuding ya taoba mapang NSF nung secretary (publicity and information) aser vice president inyaka lir tir inyaksü shim.

Change of guard ya August 30 nü agia NSF indang 31 buba Inti Mungdang tembangtsü.

School tekolaktem SLDP certificate course agiogo



Kohima, Luroi/August 29 (TYO): Nagaland nung GHSS aser GHS school tekolaktem atema School Leadership Development Programme (SLDP) dak sendakba nung ita ka atema agiba Certificate course batch 7buba asoshi tatembangbuba sentong tanü SIEMAT Hall, SCERT Kohima nung agiogo.

Iba training ya July 29 nü tenzük aser August 29 nü tembangogo, koba Nagaland Education Project-The Lighthouse (NECTAR) den longjemmer ayongzüka agia liasü.

Iba sentong ya school lenirtem tashi itshidaktsütsü aser school tajungba achaayangtsü aser kanga junga len anitsü asoshi tenüngdakba shisatsü aser skill agütsütsü nükjiding nung ayongzüka agiogo.

Trainingnung shilem agirtemi benokba project work dak sendakba nung report ka Dr. Thebi Joseph Shupao, Research Associate, SCERT, aser Izeule Ramlila, SLA Faculty, SCERT nati metetdaksü.

Training nung shilem agirtemisa parnok tebilembatem lemsatep aser iba sentong nung

angzükba ajanga parnok professional mapa nung terenlok dak kongshiba indang lemsatep.

Sentong ya Additional Director & Cell Head, SIEMAT, SLA, SCERT, Nagaland, T. Lima Longkumer-i o tatsüka jembir tembang, shibai training nung shilem agirtem nem tenüingsang agütsü aser parnok dang parnoki angazükba ya pei school nung takok ngua benoka inyaktsü ajungshia liasü.

Training tembangba sentong ya Benjungdenla Yaden, Reader, SCERT lenisüba nung agi.

Labour Commissioner-i ken o jangjashitsür

Dimapur, Luroi/August 29 (TYO): Labour Commissioner, Nagaland, Er. S.L. Wati Aier-i sangdong ka ajanga, tetsürtem aonung mapa inyakdaksüba dak sendakba nung Nagaland Shops & Establishments Act, 1986 Section 20 dak ajemdaker ken o jangjashitsüogo.

Paisa, Nagaland Shops & Establishments Act, 1982 kübok Section 20 dak ajemdaker Nagaland nung tang tetsürtem aonung mapa minyaksü atema tenokdangba agüja ozüing kecha benoka mali, ta ashi.

Teküboklen agüja aliba onüktem dak ajemdaker

tetsürtem aonung 7 ako adena mapa inyaktetsü.

1. Voluntary Consent - aonung mapa inyakba ya tetsür shiba mapa inyaker la mulungka nung asütsüla aser lai tezüluba nung temelaba agütsütsüla.
2. Kümzüka toktsütsü atema jenjang agitsütsüla - Senzüsenpongtsü atema gari kanga junga anepalutsütsüla aser parnok senzüsenpongba mapang aser office nung mapa inyakba mapang tekümzüka kübok toktsütsü atema lighting aser security kanga junga anepalutsütsüla.

3. Labour Laws sülen anidaktsüla - Act aser iba den apet labour temzüing oziing kübok Mapa inyakba mapang, mapang talila mapa inyakba, mapa tinyakdak nung anisüngzüka mapang aser weekly holiday amala inyakyim sülen tashi anga anidaktsüla.

Maneni Labour Commissioner-i, ken o jangjashitsüba ya benoka inyaksangshi tenzüksü, aser iba osang ya ken o dak sendaka aliba ketdangsürtem nungi temelaba agir sangdongba lir ta metetdaksü.

Mupongchuket Arogo-i Free Multispeciality Camp agütsür



Mupongchuket Baptist Arogo küm 150 ajungba Quasquicentennial nüngtem nung Free Multispeciality Camp ayongzüka akaba nung Doctor-tem aser Mupongchuket Baptist Arogo Pastor Rev.Jongpong külemi tanokba noksa.

Mokokchung, Luroi/August 29 (TYO) : Mupongchuket Baptist Arogo küm 150 ajungba Quasquicentennial 2025 December 27 nungi 28 tashi "Khrista Ajanga Yimjung" ta asüba omen nung ajemdaker amongtsü sentongtem renema lir.

Mupongchuket Baptist Arogo-i iba Free Multispeciality Camp ya Quasquicentennial dak ajemdaker Asetkong tzükong nüburtem atema August 29 nü Impur Christian Hospital aser August 30 nü Mupongchuket nüburtem atema ayongzüka kanga dang takok ngua agidagi.

August 29 nü Impur Christian

Hospital nung Asetkong tzükong nüburtem atema Free Multispeciality Camp akadang temang tendanga tetendangba balala agia pei timtem den apet mozü angati agütsüogo.

Mupongchuket senso rongnungi Doctor 35 lir aser item rongnungi iba Free Multispeciality Camp nung Doctor 17-i shilem agia yaritepdagi aser anükapang Doctor 25 nungi parnok 6-i aruagi shilem agia yaritepdagi. Aser iba den ano technician 15 ajanga laboratory nung, X-Ray, Ultra sound aser tapu balala teyariteper parnok 70

tashii nentaka anepaludagi.

Mupongchuket Baptist Arogo-i iba Free Multispeciality Camp nung nübur 1200 tashi temang tendanga tetendangba balala agia mozü angati agütsütsü asoshi renema lir.

August 30 nü Mupongchuket yimtak kasa Free Multispeciality Camp ya akatsü. Mokokchung District kübok Free Medical Camp Arogo mesüra telok balalai ayongzüka akaba rongnung Doctor timtibai shilem agia nübur temang tendanga angati mozü agütsüba ya iba ya tulutiba asütsü.

Mnister KG Kenye-i senden ayonger

Dimapur, Luroi/August 29 (TYO): September 2 nü nungi tenzüka terpezübuba Nagaland Legislative Assembly Session 7buba amentsü aliba dak sendakba nung Minister for Power and Parliamentary Affairs, KG Kenye-i terpezübuba Nagaland Legislative Assembly atema Legislators 60 prongla senden ka September 1 nü 11 ako nungi tenzüka State Banquet Hall, Kohima nung amentsü ayongzüko.

Anungji iba senden nung

Legislators ajak tamakok maludaktsüi arua shilem agitsü mepeshia metetdaksüogo.

Kasa mapang nung Minister for Power and Parliamentary Affairs, KG Kenye-isa, September 1 nü 10 ako nungi tenzüka State Banquet Hall, Kohima nung NDPP Legislature Party senden ka amentsü ayongzüko. Iba dak sendakba nung NDPP Legislature Party züngsem ajak dang senden nung arua shilem agitsü mepeshia metetdaksüogo.

Mokokchung BJP Unit tir-i Chungtia yimtsüng semdang



Dimapur, Luroi/August 29 (TYO): Bharatiya Janata Party (BJP) Mokokchung District tir O. Tinu Longkumer aser district party ketdangsürtemi tawa anentsüh aluba ajanga teraksatsüba bener arutsüba asadangtsü asoshi Chungtia yimtsüng semdangogo.

Iba tesem semdangba mapang party lenirtemi Chungtia Village Council den

senden amen aser anentsüh ajanga kongshir aliba kibongtem atema aria bilemstsüba lemsatepa liasü.

Longkumer-i, iba amala timtem tia nung aliba mapang yimdaklirtem den par party nokdaka aliba metetdaksüba den BJP Mokokchung unit-i takokba tashi teyari agütsütsü atema Village Council nongita yaritsü ta tenangzüka agüja liasü.

District Level Youth Festival ayonger

Dimapur, Luroi/August 29 (TYO): District Youth Resources Officer, Kohima, Atoli Yeptho-i sangdong ka ajanga, Kohima aser Tseminyu districts nung Level Youth Festival 2025, "Viksit Bharat @2047 and the Role of the Creator Economy" omen nung ajemdaker amungtsü ta metetdaksüogo. Benjung mapang sobaliba ken, tsüingsang aser o jembiba tetoktepba alitsü.

Iba tetoktepba nung shilem agitsü jangra aliba kija, club,

cultural troupe, college aser higher secondary school tem ajak jaokogo. Iba sentong nung shilem agitsü tejangraba aliba shiti ya September 9 nü tashi nungbo DYRO office nem agütsütsüla, ta kasa sangdong ajanga metetdaksü.

Osang tejangjaba agitsü atema item number nung tongteprateptsü metetdaksüogo:

Kohima :	7005869515
	7005525089
Tseminyu :	8014653998
	8258898621.

Tseminyu nung orientation sentong ka agi

Dimapur, Luroi/August 29 (TYO): NEP-2020 dak ajemdaker inclusive education dak sendakba nung anogo ka atema orientation sentong, SDEO Tseminyu den longjemmer SCERT Nagaland Kohima-i ayongzüka August 29 nü EBRC Hall, Tseminyu nung agiogo.

Iba sentong nung Vice Principal and Health IE & ICT, SCERT Nagaland Kohima, Daniel Thong; Medical Surgeon, TB Hospital Khuzama, Dr. Asunu Thong; Music Therapist Jo Foundation Kohima, Rukuse Sakhrie aser Lecture DIET

Wokha, Aylwin Semp nunger shisalen sayur liasü.

Orientation sentong nung Government School nungi tesayurtem, Arogo tenzükertem aser differently able (Handicapped) union Tseminyu District nungeri shilem agia liasü.

Sentong ya SDEO Tseminyu, Asao Seb lenisüba nung agi aser SDO(C) Tseminyu, Tsidi-i o tatsüka jembai. Maneni Coordinator, EBRC Tseminyu, Rushvulo Khing-i lokti pela agizükba o jembai aser IERP Shasenle Kent-i tepela o jembia liasü.

Tuensang nung DLCC senden menogo

Dimapur, Luroi/August 29 (TYO): VPRP-GPDP (Village Poverty Reduction Plan- Gram Panchayat Development Plan) atema Tuensang District Level Coordination Committee (DLCC) senden August 29 nü Deputy Commissioner aser

Chairman VPRP-GPDP, Lithrongla Tongpi Rutsa lenisüba nung DC Conference Hall, Tuensang nung agia liasü.

Iba senden ya, sorkar scheme aser inyakyim balala ayimjema inyaktsü atema line department tem nungi lenirtem den mena liasü.

India-China tesendaktep ajanga region nung yimjung alitsü: PM Modi



August 29, 2025 nü Tokyo nung India-Japan Economic Forum senden nung Ato kilonser Narendra Modi aser Japan Ato kilonser, Shigeru Ishiba na den tongti ketdangsertem tangokba noksa nung angur.

New Delhi, Luroi/August 29

(Agencies): Hokolbarnü Ato kilonser, Narendra Modi-i, alima nung rongsenkettzüng jenjang tashi itta alitsü atema India aser China nati longjemer inyaksüji kanga tongtibang, ta metetdaksü.

Japan nung interview ka nung jembidang Modi-i, "Linük ana tsüngda (India-China) asalentong tsütsü tesendaktep aliba nungi teti atema tesendaktep tajungba akümtsü atema India-i melunga lir, aser ibaji külem akhümtsübutep aser külem tejangrabatem nung ajemdaker asütsüla," ta metetdaksü.

Paisa, kidanger linük ana aser alima nung nütsüng teimba

aliba linük ana tsüngda tesendaktep tashi itta aliba ajanga region nung dang masü saka alima nunga yimjung aser azükaru atema inyaktetsü, ta ashi.

Tang ama mapang ka nung China den tesendaktep junga alitsüji tongtibang asü? ta asüngdangba langzüdang Modi-i, "Tir Xi Jinping-i jaokba ama ni yang (Japan) nungi Tianjin-i oa SCO Summit nung adentsü. Yaküm Kazan nung Tir Xi den ajurutepe senden amenba sülen linük ana tsüngda tesendaktep tajungba kümogo," ta metetdaksü.

Paisa, "Tang ama alima rongsenkettzüng tensa ka nung rongsenkettzüng tulu aliba linük

ana ama India aser China nati alima rongsenkettzüng jenjang tashi aittsü atema longjemer inyaksüla," ta metetdaksü.

Tawa pai Russia Tir Vladimir Putin aser Ukraine Tir Volodymyr Zelenskyy na den phone ajanga jembiba dak sendakba nung pai, "Lenir anapronglai iba rara dak sendakba nung kü den parnok tebilemba lemsatepogo. Ni tenaprongla dang iba rara anentsü atema ken o jembitsü aser ketdangsertem tsüngda inyaksangshitsüji India tangatetba lir ta shiogo. Iba rara anena yimjung alitsü atema inyakba maparen nung India-i nungita yaritsü melunga lir ta ni shiogo," ta metetdaksü.

Bihar nung 'Mukhyamantri Mahila Rojgar' scheme agizük

New Delhi, August 29

(Agencies): Hokolbarnü Bihar nung Nitish Kumar-i aniba sorkari tetsürtem nem tashi agütsütsü atema 'Mukhyamantri Mahila Rojgar Yojana' scheme agizükogo, ta ketdangsertemi metetdaksü.

Chief Minister Nitish Kumar leniba nung amenba Cabinet senden nung iba scheme agizük. Iba scheme kübok Bihar nung kibong shia nungi tetsür ka nem mezüngbuba instalment nung sen 10,000 agütsütsü. Pei jangraba mapa ka tenzükba nung yariteptsü atema senotsü teyariji agütsür. Iba scheme atema kobi meli maparen tenzüksü aser senji beneficiaries indang bank account nung indangindanga inoktsütsü.

Tetsürtemi pei jangraba mapa ka tenzükba sülen ita trok lir ketdangsertemi ibaji asadangsü, aser junga inyaktertem nembo ano sen lakh anana (2) agütsütsü.

State sorkarisa tetsürtem inyaktetba osettsüset balala ayoktsü atema yimsüngtem aser jilatem nung haat bazaars

amenoktsütsü.

Iba mapatong ajanga tetsür aikati mapa maongka angutsü aser rongsenkettzüng jenjang tajungba akümba den mapa bushia tanga state temi aoba ajema akümtsü.

Iba scheme agizükba sülen Janata Dal (United) MLC, Neeraj Kumar-i Chief Minister Nitish-i state nung tetsürtem taküm jenjang ajungkettsütsü atema maneni inyakba asoshi tenütsang agütsü.

Neeraj Kumar-i, "Chief Minister Nitish Kumar-i 2005 küm November 24 anogo nungi tenzuka tetsürtem atema mapang tajung aika inyakja arudar. Tangbo asen jalatem aser aianutemi Police Department nunga densema nüburtem kümzüker. Pai aianutem atema mapa tajung aika inyaksüogo aser Bihar nung tetsürtem nem menden shilem 35 wazüka yutsüogo. Tang tesüsa pai kibong shia nung tetsürtem tangar dak memetaloki alitsü atema senotsü teyari agütsür," ta metetdaksü.

Sachin Pilot-i Centre dang tasüngdangba 3 asüngdang

New Delhi, August 29

(Agencies): Tang Congress Party-i Bihar nung 'Voter Adhikar Yatra' agiba mapang nung Hokolbarnü Congress General Secretary, Sachin Pilot-i Centre sorkar dang tasüngdangba asem asüngdangogo.

West Champaran nung Pilot-i, Election Commission dak melung malemtsüsa lir, aser vote auyaba ya nüburtemi magizüktetsüla, ta ashi.

Pilot-i X ajanga, Rahul Gandhi aser RJD lenir Tejashwi Yadav nati agiba Yatra ya nüburtem nem tanaben democracy nung temelung lemtetdaksütsü atema lir, ta ashi.

"Rahul Gandhi-i kuli agüja tasüngdangba aika asüngdangogo saka Election Commission-i telangzüba magütsür," ta Pilot-i metetdaksü.

Pilot-i Centre sorkar dang, "Chief Election Commissioner shimba maparen nung kechiba Chief Justice of India (CJI) agien aser kechiba Home Minister züngok?" ta asüngdang. Paisa, "CCTV noksatem indoktsü atema shibai mela?" ta asüngdang.

Maneni pai, "Supreme Court-i Congress nem voter list agüjang ta tuyu, kechiba kasa anogo nungji temzüng melenshi? Parnoki voter list agütsütsü

makok asü? Shibai ibaji tuyu?" ta asüngdang.

Taküm küm tetenzüklen Rahul Gandhi aser Prashant Kishor na densema yimtenren lenir aikati Chief Election Commissioner tasen shimba inyakyim ashishia liasü. February ita nung Centre-i Gyanesh Kumar CEC asütsü ta sangdonga liasü.

CEC shimba selection panel nungji Ato kilonser Narendra Modi, Union home minister Amit Shah, Union law minister Arjun Ram Meghwal aser Opposition lenir Rahul Gandhi nunger liasü. Iba panel nung Chief Justice of India (CJI) agienbaji Rahul Gandhi-i shishia liasü.

Ano külen taküm June ita nung Election Commission-i state nung election ketdangsertem dang election mapang amshiba CCTV footage ji anogo 45 sülenbo indokang ta tuyua liasü.

Sachin Pilot-isa Bihar yimtiba, Patna nung BJP nung inyaktertem aser Congress nung inyaktertem tsüngda raraba aija liasü.

"Tanü Bihar Pradesh Congress Committee headquarters nung rara adok. Tang opposition amokmerenba yimya ya kodanga magizüktetsü. Patna nung tatalokbaji onoki sashia aitsür," ta Pilot-i metetdaksü.



August 29, 2025 nü Mumbai nung aliba Azad Maidan nung activist, Manoj Jarange Patil-i Maratha reservation atema takhangba agüja lumidang tangokba noksa nung angur.

10TH REGIONAL SARAS FAIR 2025

"EMPOWERING RURAL ARTISANS. ENRICHING LIVES"

JOIN US IN DISCOVERING THE RICH HERITAGE OF RURAL COMMUNITY:
HANDLOOM & HANDICRAFT | JEWELLERY & ACCESSORIES | HOME DÉCOR | PLANTS | NATURAL PRODUCTS | LIVE FOOD STALL | AND MANY MORE

VENUE: NAGA SHOPPING ARCADE (adjacent to The Garden), DIMAPUR

DATE 1ST TO 10TH SEPTEMBER, 2025

TIME 9:00 AM TO 7:00 PM

Follow us on
@nagalandsrlm @nagalandsaras

Way to Saras Fair

Organized by
Nagaland State Rural Livelihoods Mission (NSRLM)
Department of Rural Development,
Government of Nagaland

Sponsored by
Ministry of Rural Development,
Government of India

PARTICIPATING STATES
SIKKIM, MANIPUR, ASSAM, ARUNACHAL PRADESH

DEPARTMENT OF RURAL DEVELOPMENT, GOVERNMENT OF INDIA
DEPARTMENT OF SOCIAL WELFARE, GOVERNMENT OF INDIA
DEPARTMENT OF LAND RESOURCES, GOVERNMENT OF INDIA
DEPARTMENT OF AGRICULTURE, GOVERNMENT OF INDIA



TIR YIMYIM YIMOBILEM (EDITORIAL)

DIMAPUR

KÜPTOKNÜ

LUROI 30, 2025

ECI malenbangtsüla

- P Tiamongba Aier

Congress lennir Rahul Gandhi-i Bihar nung 'Vote Adhikar Yatra' ayonga agiba nung nisung aikati shilem agia arudar aser iba sentong ya Opposition longjemba sabang ka ama akümba ajiteter. 'Vote Adhikar Yatra' ya anogo 16 atema agitsü aser Bihar kübok district 20 sema senzür September 1 nü Patna yimti nung tembangtsü. Kechiba iba sentong ayonga agir ta süra, Bihar nung taküm October-November meta assembly elections agitsü lia ECI-i mapang masüba ka nung electoral rolls atema Special Intensive Revision (SIR) agiba magizükba aser tim masü ta sayua agir. Bihar nung elections agitsü lia SIR agiba ajanga chichiba vote agütsüsupurtem tenüng züngdoktsü akok ta Congress-i anir Opposition telok balalai aitsür. Rahul Gandhi-i iba yatra ayongzüka agia arudang Opposition telok balalai ECI aser BJP aija shilem agia arudar. August 27 nü Tamil Nadu Chief Minister M.K. Stalin-i Muzaffarpur nung Rahul Gandhi, Rashtriya Janata Dal lennir Tejashwi Yadav aser CPI-ML lennir Dipankar Bhattacharya nunger den külemi iba sentong nung shilem agia liasü. Bharatiya Janata Party (BJP)-i Election Commission of India (ECI) ya par kübok yua lir aser parnok i aginüba ama inyaksangshidaktsür ta Stalin-i iba sentong nung jembidang tai tongloktsüogo. Ano, September 1 nü Patna nung 'Vote Adhikar Yatra' tembangba sentong nung NCP lennir Sharad Pawar aser SP lennir Akhilesh Yadav na den TMC aser Left party lennirtem adentsü osang angazüker. ECI scheme ajanga BJP aser parnok den yaritepba teloktem nem teyari agütsür aser Opposition nem takoksa bentsür arur ta ken o adoka jembir. Iba ECI scheme ajanga vote auyar ta Opposition-i ola adoker aser Rahul Gandhi-i onük jembi shia BJP ajanga reju balala amokbanger inyaksangshiba aser election nung parnok ajangzüktsü atema ECI amshiba indang jembia arur. Bihar nung electoral rolls indang Special Intensive Revision (SIR) agiba aser ano Rahul Gandhi-i Karnataka nung Assembly constituency ka nung bushisüngdang ka süa tai putetba ajanga electoral rolls nung tim masüba aliba jungkai adoka sayuogo aser iba ajanga Opposition jembitsü aser noktaksü kuli tejangjattem nguteta lir. Bihar nung Special Intensive Revision (SIR) nung nüngdakba ama voters 98% temai enrolment form agütsüogo aser electoral list nung alir voters lakh 65 shi draft list nungi agienogo ta ECI-i ashir. Külen, Rahul Gandhi-i Bihar nung taoba electoral list nungi agienba voters teimba Dalit nunger, Other Backward Classes, Extremely Backward Classes aser nübo agi tangar memenepertem lir aser parnok teimba kati non-BJP party tem nem vote enoktsür ta metetdaktsüogo. ECI-i Bihar nung SIR inyakba ajanga Opposition sabang ka nung longjemdaktsüogo aser political party karibo tang teinyakdak Chief Election Commissioner mapa nungi anentsütsü atema-a jembiba angazüker. India ya alima nung democracy tulutiba ta züngshir aser iba ya linük aikati kanga nükshia repranger saka election maparen nung tim masüba aser külen tsütsü shir inyaksangshiba ya manenra democracy masü autocracy/dictatorship linük ka ama küma aotsü kecha meteta mali. Anungji tang Opposition-i tim masüa ta ola adokba mapang nübortemi ibaji pusema nungitra aser ola adoksemra Election Commission of India (ECI) ya tashishitsü maketba aser timi inyakba reju ka akümtsüba takoktsü lir aser iba ajangaji political party tem masü saka nübortem ang tajangzük tuluba angutsü. Kokra, ECI nem ano tashi talila agütsüsemstsü aser Centre sorkar den masü saka Supreme Court of India den ang inyaksangshia aotsüsa ozüng kar yanglutet nungbo kanga jungla.

OLEMSABANG

Shidakba Melenshitsüla

M. Meren, Ex.pastor.

(Yashi adok nungi...)

Yimtsüng aser Towntem nung sensaker, leni maor, alimai memetet nisung aser tantsür-tamburtem kenü danga Arogoi mesemdanger saka takar aser tulur yimra agi atong ta angashira tapu meina bentsür semdangbet semdang, saka nisungi mezüngshibattem ken tanga mesemdangba angutsü. Arogo item nungi temulung meyiptsüla.

Tanü Ao Arogo nung balaba kibong jentisa jenti lir aser aji timba kinungbo mesüra kinungtsü tangar den senzüba ajanga atalokba jenti lir, aser ibaji nüktabangtaba saka Arogo nungi atsüngba kata mataloker, Ao Arogo iba nungi temulung meyiptsüla.

Tanü alima nung nüktabangta agi sünga lir ta jembir saka ajakji Arogo member tajung temeja lir, saka member tajung ajungaji Tsüngrem tsüngdangbo nüktabangtar temeja agi arogo sünga alitsü südi, Arogoi ibaji shishia mali anungji Ao Arogo item nungi temulung meyiptsüla.

Tanü putu nung Ao Arogo kanga takar temeja lir, Arogo atena outreach mapa nung kanga tashi ita inyakteper hau aji Yisui nungloktsüba mapa tulu inyaker, kanga junger saka pei Arogo pei yimtsüng nung kecha Tsüngrem daka mamanger jenti, parnokji sentepi kodanga moadanger, sarasadem mesüdanger, Revival nung matener, tamanger otsü mejembidanger, anungji asen yimtsüng nung parnokji aikasa lir, süra parnokji koda ? Arogoi kenbo ki tonga odanger modang? Arogo nung yi ajemer noklang nung 80 bo alitsü südi süra parnok dangi kenbo odanger modang? Arogo nung nisung 10 nung kabo mozü achir alitsü südi, tanü asüng mozülar jenti kümdagi, süra parnok dangi kenübo odanger modang? Arogo nung tetsür aika sentsü agi nungbanger tasüang sünüa aliba aika küma odagi, süra parnok dangi Arogo kenübo odanger modang? Arogo nung students aika küm jenti tamakok anguba pur joko shisa ramar tasüang meroa aliba aiür-asangur jenti lir, parnok dangi Arogo kenübo odang modang?

Arogo nung Yi ayoker kibong mezüngdangtet lir ta jembir, süra par kibong tashi mesüra par kima kilem tashi oa sarasademtsüba kwiben ataloka arur? Pei ki toktsür yi ayoker kibong nung timba mentepa lir, idakjagi oa tashitsü ashiba kwiben ataloka inyaka arur? Taoba küm youtube nung Global Window ajanga anguba Dimapur Train station anasa asen Aor chanu ishika yi jema mozü chia amener parnok asem pezüka den adianu Süngkum Aier ajanga kanga dang anepalua jembia amenba angü, pai parnok dang asüngdang nenok tsüraburi bushir mebushir ta asüngdang, idangji asangur chanu kati langzü, taküm Christmas mapang nung kuboi ni bushia arua ashi, arung taküm Christmasbo asenok külemi mongdi ta mepishi saka ni kü medemer toktsür motetba ajanga mao aser yangi dang mapang indoker ta langzü. Süngkum Aieri tesüngmangtsü o tajung aika shia counseling agütsüdang asangursang asüktema ajep, Ao Arogotem ibaji ne mapa masü no? Ner Arogo kübok Drugs agi meseper mena alirtem, yi agi taküm ajak raksar mena alirtem mapang shia Arogoi semdanga mapang ajak nung counseling agütsü nungbo ajakjisa mesüaka aika melenshitsü takoktsü mali no tasa bilemer. Naga lima tila ka nung mozü-mora achir lakh 6 dak tali lir ta ashir, Mokokchung nung mirijang ka ser noklang pungu lir ta ashir aser Naga nunger nütsüng ajak agi lakh 20 shi ta ashir, saka aji shidakbabo masü saka shidakba agibo lakh 12 shi dang asütsü ta ashir sürabang Naga nungertembo tasadang ka dak tali mozü-mora achirtem asütsü ta angateter, süra aji Arogo teinyaktsü mapa masü no ta bilemer.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Temesepba chiyungtsü nungi jenbua alitsü tesayuba sentong agi



Impur, Luroi/August 29 (TYO): Temesepba chiyungtsü nungi jenbua alitsü tesayuba sentong ka, "Jeretperet Lenwar" (Tenüngsang Ken 119:5) omen nung ajemdaker August 28 & 29, 2025 anogotem nung Impur nung Literature & Education Ministry, ABAM ajanga ayongzükaa agiogo, ta ABAM Executive Secretary, Rev. Temsü Jamir-i sangdong ka ajanga metetdaksü.

Iba sentong ya Asso. Pastor Christian Education Ministry (APCEM) Zone 1-5 asoshi liasü.

Temesepba chiyungtsü achi ajemba ya tanü tanurtem tarutsü taküm raksatsüba tsükchir ka lir. Jangratem agütsüba temesepba mozü tapu balala aser külem medemertem tashi onsara tulu asünung, tapet anepaluba tajung magütsüra tarutsü putu nükla kecha meli kümogo. Tanurtem kümzüka ayutsü asoshi APCEM dak shilem tulu ngua iba sentong ya APCEM asoshi agia liasü.

Mr. Maong Jamir,

Secretary of Finance & Property at ABAM, shisalen sayur liasü. Pai nendaka ashiba O kaji, Arogo nung talisa toklanga tenzükertemi Drug addiction aser temesepba chiyungtsü chia ajemba kulitem meteta alinungbo, iba tebilemstü ya khenyongi tajemba akümtsü, ta ashi.

Pai sayuba rongnung tongtibangtemji, Temesepba chiyungtsü amshiba ajanga teraksa adokdaksüba, Yimya sübaba pur anepaluyim tenrentem, addiction angatetyim, Addiction jenjangtem, tekolok yimya aser Temesepba chiyungtsü amshiba ,soft drugs, tanaben meyipa oa chia ajemba ya tekolok tashidak aser temesepba chiyungtsü amshiba toktsüba mapang timtem liasü.

Paisa APCEM dang, nenoki bendanga agüja tenzükbaja ajanga tarutsü putu nung tesasa maliba lanurtem asütsü nükla tulu yuang, ta ayongzükbaja.

Rev. Temsü Jamir, Executive Secretary of

ABAM, ajanga APCEM dang nenok wadang nung tayimjemba nung inyaka aotsü asoshi, angazüktsü jangraba, angazükbatem intoktsü tashi, aser maneni angazükshiba taküm kaka süang ta ashi.

Pei tajaba nükjidong tejangja metetba ajanga na ya shibaar nai metettsü, koba ajanga nai Tsüngremer nükjidong tejangjaba nung mulung lemteta wadang inyaktettsü, ta paisa ashi. Tanurtem tangatetbatem meteta nü wadang inyakang, kechiaser tanü putu tanurtemji khenyongi shisatsü balaka lir. Teti inyaka aruba yimya nungi alia oa tanurtem den koda ochiba nung par tebilemba den medemdanga inyaksü, ta asüba nung inyaksü pai ajungshi. Tanurtem nem shisatsü inoktsüba kisüing mesüi parnok ajungmesotettsüsa par yimya angateta tenzükbaja pai ajungshi.

Ajak agi Arogo 46 nungi APCEM 46 arua iba sentong nung aden. Tsüngrem tsübuba putu ka yangertettsü sarasadem ayur.

UP nung tekülem sentong tagidak mapang Khristan 7 apu

August 29, 2025: August 24, 2025 nü Uttar Pradesh state tesem balala nung Khristantem tekülem sentong tagidak mapang nung Hindu nationalist telok balala nungi züngsemtemi timtem agütsüba sülen Khristan tenet puogo.

Amongnü (August 24) Uttar Pradesh kübok district pezü- Mau, Ghazipur, Jaunpur aser Budaun nung tesem trok nung Khristantem tekülem sentong tagidak mapang nung Hindu nungertemi timtem agütsüba sülen police-i Khristan tenet apu.

Uttar Pradesh nung anti-conversion ozüng kübok parnok anema ken o benokba sülen parnok tenetprongla local courts-i anir ao, aser tang parnok ajak judicial ket nung lir.

Tenük kuli alirtemi ashiba agi, Bajrang Dal nungi züngsemtemi state tesem

balala nung Khristantem tekülem sentong nung timtem agütsüba sülen police aja.

Khristantem jagi sensakertem aser Dalit nungertem nem shisaliok, healthcare aser tanga teyari balala agütsütsü ta mesüzüka Khristan yimsü dangi meyipdaksütsü meranger, ta Hindu nungertemi tai tongloksü.

Ajisüaka Khristan lenirtemibo, "Hindu nungertem jagi tiyazü nung Khristantem nem tai tongloksü. Amongnü sarasadem sentong agiba-a ozüng alema inyakba mapa ama kümdaktsüogo," ta metetdaksü.

India nung nütsüng teimba aliba state, Uttar Pradesh nung 2021 küm anti-conversion ozüng benoka liasü. Iba ozüng kübok aibelenertem küm 20 tashi tepuokdak ayutsü akok.

Iba ozüng benokba sülen state nung police-i Khristantem anema ken o 400 dak tali benokogo.

Uttar Pradesh nung reshikangshiba Khristantem nungita yarirtem rongnung ka, Pastor Joy Mathew-i, "Khristantem anema ken o aika benokogo, ajisüaka tang tashi nung Khristantemi ozüng alema yimsü meyipdaksüogo, ta ken o ka nunga aija mali. Tiyazü nung tai tongloksüba nung ajemdaker tang Khristan 59 jail nung puoka lir," ta metetdaksü.

United Christian Forum-i ashiba agi, taküm küm tenzükbaja sülen July ita tashi nung Uttar Pradesh nung Khristantem anema inyakba tatalokba 97 lir.

Yaküm-a Uttar Pradesh nung Khristantem anema inyakba tatalokba 209 liasü.

ANOGO ABEN TSÜNGREM DEN

Aria bilemba counsellor

"Saka nenok oang aser ya kechi tetezü-ar, angazükang, ni tenla masü, taochi aginür"

(Mathi 9: 13)

1. Ne tebilemstü taroktiba lemsateptsü asoshi nai kechi koma nübu ka aginür ?
2. Nai iba ama nübu akümtsü mulungtsü asü? Khristan counsellor asoshi taginübaji shiba den tangari tesüiba aser tang aliba tebilemstütem temulung doka lemsatetter iba jakla adenba Khristan Counsellor atema College degree menüngdaker.Aji saka shirnoki counseling mapa inyaker, parnok Laishiba nung amendaker agütsüba training agiba jagi tulu ka yaritsü. Na kong lidir liang, aria bilemba shisatsü ne dak lira Tsüngremi na tangar yariba nung amshitsü.

Nai nisung ka pa otsü ajungaji memetetra pa/laji nai meyaritettsü. Nisungtemi asenoki parnok asoshi kodaka aria bilemstü aji memetetra, asenoki kodaka metet parnoki au ta malitsü. Aria bilembaji yaritsü asoshi tasa kar angazükba masü; ibaji Khristan jakla aser temeim lir. Counsellingji tesüiba tebilemstütem bentetba ajanga tang aliba tebilemstütem nung yaritsü lenmang bushiba lir.

Temulungjang Satan talidak yangludaktsüba ajanga tebilemstü adoker. Nisung nüji masüba ajanga aintsü makoker. Counselling nükjidongji Khristantem nem Khrista nung nüji akümba metetdaksütsü aser pa den jajaa tejang atangba taküm ka kümdaktsütsü asoshi lir.

Kibuba, aria bilemba shisatsü kü dak renlok dakjang, idangji ni tangar yaritettsü.

Chhattisgarh nung ketdangsertemi House Churches nokdanger

August 29, 2025: register süa aliba Tenla kitem Chhattisgarh nung sorkar ketdangsertemi tenokdangba tasen ka benokba sülen state nung house church 200 dak tali shibanga Khristantemi kidang tekülem sentong magiteter, ta International Christian Concern (ICC)-i metetdaksü.

Tzüzüng ozüng tensa azüoktsü atema house churches nokdangtsüsa akümer, ta sorkar ketdangsertemi metetdakja liasü.

Tesüiba hopta ana tsüngda state yimtiba, Raipur aser temeket nung aliba tesemtem nung house churches ajak shibangogo, aser tetuyuba tashi mangaba agi August 24 nü pastor kabo puogo, ta kasa osang ajanga metetdaksü.

Hopta ishika tejaklen Raipur nung police tongti ketdangseri pastor tem lokti senden kati jaoka liasü. Iba senden nungji pastor tem dang, tang nungibo Khristantemi house churches nung tekülem sentong magitsüla, kechiyong item ama sentongtem nung ozüng alema yimsü meyipdaksüba tashishiba aika lir, ta metetdakja liasü.

Iba dak alia superintendent of police-isa pastor tem dang, Khristantemi official süa

nung dang tekülem agitsü melatsü, aser tensa meraksatsü atema nija kidang tekülem sentong agiba ajak anentsüla, ta metetdakja liasü.

Pastor kati house church tanaben lapoktsü merangba atema apu. Yamaji state tesem ajaklen pastor tem aser Khristan lenirtem aputsüa akok.

International Christian Concern (ICC) den jembidang Raipur nung register süa aliba Arogo ka nung Pastor, Sanjay-i, Khristan yimsü aintsü atema house churches nüngdak, ajisüaka tongti Khristan organization aser Arogo tulutemi house churches nung pastor tem nungita meyarir, ta ashi.

Pastor Sanjay-i, house churches nungji züngsem 30 nungi 100 shi dang alir, aser item Arogotem nung pastor temji kanga sensakertem lir; ibayongji sorkar ketdangsertem aser Hindu yimsü alia amangertemi parnok anema melamela inyaker, ta metetdaksü.

Police tetuyuba anema Khristantemi Chhattisgarh High Court nung temepishiba ken o ka benokogo, aser tang iba ken oji tangadangkak.

AO OSHI ANGAZÜKDAK:**TANÜ ANGAZÜKTSÜBA OJANG**

Tir Yimyim

Tetemjen


(adj) tetemsü aser tapet (perfect)

* Alima nung tetemjen nisungbo mangutsü.

Tetemlok

(adj) asen aputsüba nung tali agiba (interest in money lending)

* Temeim aketba takari tetemlok melii sen aputsür.

OLONG PAITEP # 7255**TIPIEN**

- | | |
|--|--|
| 2. Tetsür tesashi - (5) | 1. Süngjang tanang ka - (4) |
| 6. Temang den meputepba chiyongtsü - (4) | 3. L _ _ _ t - (4) |
| 8. Aket/saklok - (4) | 4. Kija - (6) |
| 9. Ali nung tarok atuba - (6) | 5. Süng tema - (7) |
| 11. Ar-r keta aliba - (4) | 7. Mesaklok - (6) |
| 12. Anü adokli - (7) | 10. Tsüngrem dak mamanger - (7) |
| 13. Pela dang yamai asür - (4) | 11. An dak alibashiruru tila ka - (6) |
| 14. Teben nung eokba - (5) | 12. Tzünglo arudang apongba - (6) |
| 16. Kiset ozü ka - (4) | 14. Lemang tekirak - (4) |
| 17. Apuzüa senzüba shiruru tila ka - (4) | 15. Temechi-o-süngjang tetsüngda - (4) |
| 18. Sapisayang - (5) | |

LANGTSÜNGLEN**OLONG PAITEP # 7254 TELANGZÜBA****TIPIEN :**

1. Yiar, 3. Tesola, 7. Yimra,
8. Tangar, 9. Peria, 10. Tanur,
11. Tasen, 13. Lemjem, 15. Tambu,
16. Khuret, 17. Sang.

LANGTSÜNGLEN :

1. Yimti, 2. Amen, 4. Shiner, 5. Alaka,
6. Satan, 9. Putet, 10. Tembar,
11. Tatok, 12. Amang, 14. Jala.

NAI-A YA METETTER MA

Pengana (tomato) dang ya French oshi agi pomme d'amour, or the 'Love Apple' ta-sa jaya liasu. Mapang talangka TOMATO ya süngjanglijang (fruits) mesüra aonsotsü (vegetables) rongnung densemetsüla ta o entepa mangmangtep aser mebendangteti amshia aru. Iba sülen, 1883 küm nungi ang Aonsotsü (Vegetables) tariff nung züngsem aser TOMATO ya Süngjanglijang (Fruits) masü ta U.S. Supreme court ajanga sangdong.

Indo-Myanmar arrtsü atsütsü sentong aliba Mizoram-i magizüker**Aizawl, Luroi/August 29**

(Agencies): Mizoram Home Minister K. Sapdanga-i Brehostibarnü ashiba agi, Centre-i Mizoram nung Indo-Myanmar arrtsü atsütsü atema sentong yangluba ya sorkari magizüker.

State assembly nung jembiba mapang Sapdanga-i ashiba agi, international arrtsü atsütsüba ya Union sorkar tashi küboki aiter aser Centre-i iba ken o asadangtsü atema Assam Rifles den sendaktepa inyakdar.

Paisa, ali kibur ama Mizoram sorkari iba ken o süoki ia bilemba lemsatepogo, saka arrtsü nung aliba tesemtem achaayangtsüba dak sendakba nung Centre inyakyimtem pusemer ta ashi.

Minister-isa, 2024 küm February ita 28 nü Myanmar den arrtsü nung atsü atsütsü sentong aliba aser Free Movement Regime (FMR) aginba anema bangzüng agizükba indang lepszia jembiba.

Iba bangzüng ajangsa Modi-i aniba sorkar dang linük balala nungi prokshia aliba Zo



Mizoram Home Minister K. Sapdanga

nungertem administrative unit ka kübok longjemdaksütsü atema jenjang agitsü mepeshia liasü.

Sapdanga-i ashiba agi, state sorkari taoba mapanga arrtsü nung atsü atsütsü asoshi sentong aliba anemogo aser assembly o cabinet tamendakdak jangja metetdaksütsü atema 2024 küm March ita Lok Sabha sekretariat dangi aser 2024 küm April ita Home Ministry dangi shiti yokogo.

Mizoram aser Myanmar Chin state na arrtsü km 510 lir

asir Mizo nunger aser Chin nunger ya shilu ka dang lir. Tang Chin state nung refugee 29,000 dak tema Myanmar nung jenoka lir, shirnok military-i sorkar atsünga sülen jenshia oa liasü.

State sorkarisa Myanmar nunger aser Bangladesh kübok Chittagong Hill Tracts (CHT) nungi tejenokdak bushia aryr alirtem indang biometric enrollment agiogo.

Young Mizo Association (YMA) densema lokti tentet balalai arrtsü nung atsü atsütsü aser FMR agintsü telemtetba agiba anema nokdaka arudar.

Assam: Amit Shah-i opposition party tem aitsü**Guwahati, Luroi/August 29**

(Agencies): Bihar nung rally ka agiba mapang Congress aser Rashtriya Janata Dal (RJD) lenirtemi Ato Kilonser Narendra Modi tetsü asür Hiraba tiluja jembiba atema Union Home Minister Amit Shah-i Hokolbarnü parnok aitsüogo.

Guwahati nung Raj Bhavan, Brahmaputra Wing lapokba sentong nung o jembiba mapang Shah-i, iba amala o jembiba ya politics nung ajak dang tekübokba jenjangi ajemzüka aluba lir ta ashiba den, Congress lenir Rahul Gandhi aser par party dang Ato

Kilonser, pa tetsü aser lisopurtem dang tatok meshitsü shiogo.

"Election ya democracy temulung lir. Electoral rolls nung ozüng alema arurtem tenüng züngoksema lira aser election inyakyim menena lira linük kodaser kümzüka litettsü? PM Modi tetsü kanga tongmelang taküm ka ali aser ajemalua lar chirnurtem anitetogo aser parnok rongnung ka alima nung nüngtugu lenir rongnung ka aküm. Yimden yimsüsüba sabang ka nungi la aitsüba ya taksüka," ta Shah-i ashi.

"Congress lenirtemi iba

amala o jembiba nüburtem atsüa arutettsü ta bilemer asü? PM koda taliba tilutsür yamaji Lotus taliba apongtsü ta metetdaksüner," ta pai ashi.

Shah-isa, Opposition-i Bharat Jodo Nyay Yatra ayongzüka agiba aitsüogo aser ashiba agi, iba ya "Ghuspaithiya Bachao Yatra" (Save Infiltrators March) ka lir, koba Congress indang vote bank kümzüka ayutsü atema political campaign ka lir.

Student politics indang bilemtetshia jembiba mapang Shah-i, küm aika tejakdang Akhil Bharatiya Vidyarthi Parishad (ABVP) rally mapang pai Assam semdang, kong Punjab aser Assam police-i longkak aita aliba kaketshirtem dak züka liasü, ta ashi.

Iba mapang den medemdangra Assam kanga renlokogo aser iba ya PM Modi aser CM Himanta Biswa Sarma na lenisüba nung ataloka odor, ta pai ashi.

Manipur: Security force temi telungpur tesepongungu maktok**Imphal, Luroi/August 29**

(Agencies): Security force temi Manipur nung telungpur tesepongungu maktoka prangbong injang aser bomb aika ngutetogo, ta ketdangsürtemi Hokolbarnü metetdaksü.

Police-i ashiba agi, state kübok district pezü nung Brehostibarnü central security forces aser civil police na senteper maita oaba sentong ayongzüka agia liasü.

Telungpur teseptem ya Bishnupur district nung Moirang police station kübok Phubala Patton Mamang nung

ka, Imphal East district nung Sagolmang police station kübok Uran-Chiru tenemtsüng nung ka, Jiribam district nung Jiribam police station kübok Jairolpokpi aser Mongbung Meitei yimtsüng na tsüngda ka, Kangpokpi district nung Keithelmanbi police station kübok Kotzim yimtsüng nung ka aser Maohing aser Changoubung yimtsüng tsüngda arem nung ka ta nguteta raksatsüogo.

Sepaitemi INSAS rifles asem den magazine, AK-56 rifles ana den magazine, Ghatak AK-47 rifles asem den

magazine, self-loading rifle (SLR) ka den magazine, MP5 rifle ka den magazine ana, 9mm carbine ka, single-barrel rifle ka, pull mechanism rifles asem, improvised mortars asem, hand grenades pongu, kar vials 30, country-made muzzle-loading rifles pongu, AK injang 45, Baofeng walkie-talkie set ka, lead pieces100, aser kar atsüngtsü amshiba merang intong trok ngutetogo.

Parnok ngutetba prangbong aser injangtem ya ken o dak sendaka aliba police station tem nem bendanga agütsüogo, ta ketdangsürtemisa shisem.

Thai court-i Ato Kilonser Paetongtarn Shinawatra anentsüogo



Bangkok, Luroi/August 29 (Agencies): Thailand Ato Kilonser Paetongtarn Shinawatra-i yimya meshidak amshiba mechi yimsüsüba mendeni arur küm ka dang lir Hoklbarnü Constitutional Court ajanga mapa nungi anentsüogo, anungji Shinawatra political dynasty asoshi ano takoksa tulu agütsür, koba ajanga mepetmesü tasen tenzüksü akok.

Paetongtarn ya Thailand indang ato kilonsertem rongnung tanutsütila liasü, aser küm 20 shi tashi agi raktepa arur mitkar temi atsungdokba billionaire Shinawatra kibong-i yaria la ya Thailand ato kilonser trok buba akum.

Lai June ita Cambodia indang taoba lenir Hun Sen den telephone ajanga jembiba temai adokba nung Paetongtarn ya Sen matsügdang tila akumer ama angatet. Hopta ishika lir rara tenzüik aser anogo pongu rara liasü.

Court ajanga iba telemtetba agiba yong ato kilonser tasen asoshi parliament-i election agitsü lenmang lapoktsür, koba

mapang talangka atsülangtsü akok, kechiaser Paetongtarn'er ruling Pheu Thai party ya tashi samaa aor aser züngsem ishika agi majority aliba alliance ya loksatsü akok.

Court nung obendanger 6-3 telemtetba agiba nung Paetongtarn-i linük melen la jurila tejangraba mezüing südaktsü aser linük tenüing menükja nüburtemi tamang makateti akum ta ashi.

"Cambodia den jurila tesendaktep aliba mechi, respondent ya Cambodia tsütsü mulungba sülen anidaktsü mesüra inyaktsü mulunga liasü," ta court ajanga sangdong ka nung ashi.

Iba obendang ajanga tashi tulu aliba takar tetsüti Thaksin Shinawatra'er jala anojungi ato kilonser menden nungi alutsüsa akumer. Kasa court ajanga küm ka tejakdang Srettha Thavisin ato kilonser mapa nungi anentsüba sülen arishi küm 39 tain Paetongtarn ya ajungbena temai adok aser iba mapang la yimtenren tsütsü tasen liasü.

Paetongtarn-i iba phone call

atema tatok meshi aser lai rara ka paidoktsü merangba liasü ta ashi. Constitutional Court-i küm 17 nung ato kilonser mapa nungi anentsüba la yagi pongu buba alitsü, anungji election ajanga tentetba Shinawatra kin indang sorkar aser tashi tulu aliba conservatives aser loyalist generals tsüingta yimten tashi agi raktepba nung iba court-i tongti shilem agiba sayur.

Tang Paetongtarn melentsü asoshi rangloksü, kong Pheu Thai nem coalition anidaktsütsü asoshi Thaksin-i shilem agitsü imlar.

House ajanga ato kilonser tasen ka meshim tashi deputy premier Phumtham Wechayachai aser tang aliba cabinet-i caretaker jenjang nung sorkar ketdangsüa alitsü, ajisüaka ato kilonser tasen shimtsü mapang lateta mali.

Ato kilonser akumtsü asoshi nisung pongu temsüa lir, aser parnok rongnung Pheu Thai nungi arishi küm 77 tain Chaikasem Nitisiri kisüing lir, shiba taoba mapang attorney general inyaka liasü aser cabinet inyakyim kanga jungabo memetet aser yimtenren tsütsü kangabo teyakyak masü.

Taoba ato kilonser Prayuth Chan-ocha ya ka lir, shibai yimtenren nungi anisüngzüik agi aser taoba Pheu Thai sorkar anema 2014 küm pai anir mitkar tashi amshia sorkar atsungdoka liasü. Ano deputy premier ka, Anutin Charnvirakul ya nübu ka lir, shiba phone call temai adokba mechi Paetongtarn indang coalition nungi par party anizüker ao.

Temelenshi maka aser

taküm rongsenketzüing shilem 2.3 dang aintsü imla aliba yong nüburtem temulung nung anisüngzüik makai alidang iba obendang yagi Thailand nung yimtenren tsütsü tarutsü nükla mejangjateti akumer.

Hun Sen den phone ajanga jembidang Paetongtarn-i pa dang "uncle" ta aja, koba linük ana nungi political dynasty ana tsüingta tesendaktep aliba indang temaitsü lir.

Taoba mapang Hun Sen aser Thailand indang taoba ato kilonser aser Paetongtarn tebu Thaksin nati kati ka dang "godbrothers" ta aja, ajisüaka iba sülen tena tesendaktep mejungi akum.

Hun Sen-i minute 17 phone nung Paetongtarn den jembiba ya Facebook nung lemsatep aser June ita Shinawatras-i pa

ashioktsü ta shia liasü.

Hun Sen ya Cambodia indang ato kilonser ama küm 38 inyaker 2023 küm par jabaso nung mapa melenoktsü.

Iba obendang agütsüba sülen Paetongtarn, Thai nunger ka ama ni linük asoshi inyakttsü tebilemba tejangja liasü aser iba voice clip nunga ni jurila ajangzüksü asoshi ni kecha memeshi, ta ashi.

Sepaitema süang mesüra civilian tema süang, ni nüburtem takum kumzüksü tebilemba nung inyak, ta lai ashi.

Tanü court obendang ajanga ano aritepa yimtenren melenshitsüsa akumer. Asenok kati ka den yariteptsüla aser tarutsü nung iba ama aritepa temelenshi marutsü mechi yimten tashi itdaktsütsüla," ta Paetongtarn-isa ashi.

AFFIDAVIT

I, **Mr. Sungjemy Apang**, son of Marmendang, permanent resident of H/No. 257, Alongkima, Waromong, Mokokchung: Nagaland and presently residing at H/No. 534, Lane-9, Kevijau Colony, Dumapur: Nagaland do herby solemnly affirm and declare as follows:

- That I am a bonafide citizen of India a resident of the aforementioned address.
- That my name has been recorded as **Sungjemy Apang** in all my official documents including my Pan Card and Aadhaar Card bearing No. XXXX 7529. However, in my Bank Account bearing A/C No. 910010029463885 of Axis Bank, Dimapur branch, Dimapur, my name has been recorded as **Sungtemyapang**.
- That the variations such as **Sungjemy Apang** aser **Sungtemyapang** connotes to the name of the one and the same person i.e. me and that there are no discrepancy in the name mentioned herein whatsoever.
- That this Affidavit shall be produced as a piece of documentary proof and evidence as and when required before any competent authority/ies to to declare that **Sungjemy Apang** and **Sungtemyapang** connotes to the name of the one and the same person i.e. me and further to enable me to rectify and correct my name in my bank account to as **Sungjemy Apang** before the concerned authority.

Solemnly affirmed and declared before me


NOTARY PUBLIC
Tenjontongzuk Ao
Notary Public
Govt. of Nagaland
Regd. No. 91/2016


DEPONENT

GOVERNMENT OF NAGALAND DIRECTORATE OF HEALTH & FAMILY WELFARE NAGALAND: KOHIMA

No.DHFW-5/D.Pharm/Part-II/2014

Dated, Kohima the th Aug' 2025

NOTIFICATION

With reference to the Letter No.F.No.11(2)-RIPSAT/ 2021/291-97/ Dated 8th May 2025. The following Candidates are selected on 29th August 2025 to undergo Diploma in Pharmacy (D.Pharm) course at Assam Medical College, Dibrugarh for the Academic session 2025. The following Candidates are provisionally selected through Academic Merit Marks.

Acceptance Letter may be submitted to the Office within 5 days from the date of issue of the Notification. Waiting List will be maintained for a period of 3 (Three) months w.e.f the date of issue of this result.

- Selected List :**
- ALEKAR WALLING
 - KIKATEMJEN LEMTUR
 - KEAMYING KONYAK
 - WERI Ü TSUHA
 - MHADENO E KITHAN

- Waiting List :**
- KHIHANLE JEMU
 - KELUNGSAMYI HEGA
 - SHEANYU KONYAK
 - SHEJEANG NYAKNYAU B
 - TEMJENMEREN

SD/- DR. MERENINLA SENLEM

Principal Director

**Directorate of Health & Family Welfare,
Nagaland: Kohima.**

Israel-i Gaza indang yimti tulutiba combat zone sangdongogo

Gaza City, Luroi/August 29 (Agencies): Hokulbarnü Israel-i Gaza nung yimti tulutiba ya 'dangerous combat zone' ta sangdongogo aser pua bener aoba nisung ana tasümgang ngutetogo, kong army temi amaktsü sentong ka yanglua aliba "initial stages" tenzükogo.

Mitkar temi asendenshir raratsü sangdongba ajanga yangji alirtem chiyongtsü aser danga osettem mangutsü, aser teyari agütsüba telok tem aser nüburtem jenoka aliba tekülem ki kati parnok dak metaloka aliba nüburtem yasa-tzüra yutsür parnok mainshitsü ta ashir.

Gaza City nung tesashiba amaktsü sentong Israel-i sangdonger hopta ishika lir iba sangdong ya arur, kong nisung meyirijang aika ayawara agi timtema jenoka lir aser mitkar temi iba yimti tezülen kiyong balala nung tang tesashiba amaker.

Israel-i iba telemtetba agiba ya United Nations agencies aser aid groups temi aitsür, aser Gaza City nung aliba nüburtemi tepila balaka mali,

kechiaser yangji taoba mapang nungi kanga sashia amaker aser teyari oset agi parnok atongba agi meperir ta ashir.

Anogo tiyongtsü ka nung mitkari raraba anena aliba agienogo ta ashi, kong anepdang 10:00 ako nungi nikongdang 8:00 ako tashi chiyongtsü aser teyari osettem bener aitaakja liasü, anungji Israel-i reservists meyirijang aika ajaba sülen tensa tamajungba tetenzüker alitsü.

"Pua bener oa alir ajak meyipa bener maru tashi aser Hamas mesamatsü tashi onoki tesashiba nung amaktsü," ta Israel army odongtar Avichay Adraee-i ashi.

Adraee ya Israel mitkar indang Arabic oshi odongtar ka lir, aser pai anogo auka Gaza City nung aliba Palestine nunger dang south tsütsüi jena aotsü ajungshia liasü aser teyari agütsüba telok temi timtem tulu alitsü ta shiaka iba evacuation ya paidoktsü makok ta ashi.

Tesüiba hopta nisung 23,000 anizüker ogo, ta United Nations-i Brehostibarnü ashi, saka Gaza City nung Palestine

nunger aikati aiben tesem melenshiba agi parnok anibelemogo ta ashi aser taolen makanung kongi aotsü ta ashir.

Holy Family Church of Gaza City ajanga osangbener dang Hokulbarnü ashiba agi, par tekülem kidang nisung 440 shi jenoka lir aser parnok den putirtem parnok yaritsü asoshi mainshitsü.

Hokulbarnü Israel mitkari hostage ana tasümgang ngutet ta shiogo, aser yangji ka Israel nunger lir, shiba October 7, 2023 nü tepseta liasü.

Ilan Weiss aser ano mejangjaba nisung ka tasümgang ya Israel-i bener ogo. "Sür alir aser takum alir hostages ajunga kidangi meyipa meshilang tashi anisüngzüka mesüra ola madoki malitsü," ta Ato Kilonser Benjamin Netanyahu-i sangdong ka nung ashi.

Arishi küm 55 tain Weiss ya Kibbutz Be'eri nung amakdang tepset.

Hamas-i anir telungpur temi nisung 251 pua bener orr ita 22 tajunger, aser tang tashi Gaza nung parnok 50 shi lir aser item rongnung 20 takum lir ta Israel-i amanger.

National Sports Day nung asayar 151 tushi



Kohima, Luroi/August 29 (TYO): Linük ajunga den jangyu medema Nagaland nunga Hokolbarnü National Sports Day mungogo, aser iba anogo state kübok tesem balala nungi Northeast, national aser International jenjang nung takok tajung angur asayar 151 tushia liasü.

Sentong nung o jembiba mapang Advisor for Youth Resources & Sports, S. Keoshu Yimkhiung -i, Khelo Bharat Niti 2025 aser Viksit Bharat 2047 den peta Nagaland Sports Policy tasen ka yangludar ta ashi. Paisa, iba policy yagi state nung saisabong jenjang ajungkettsü aser iba yagi asayartem, lokti aser linük tejangraba sayutsü.

Sorkar tenüng nung salem osang lemsatepba mapang Yimkhiung-i tetushi angurtem nem tenüngsang agütsüba den iba anogo ya India nung nüngtugu hockey asayar Major Dhyam Chand bilemteta amunger, shibai asayartem

maneni ajungmesor,ta ashi. Paisa, Chief Minister Neiphiu Rio lenisüba nung state-i districts 17 prongla nung sports infrastructure renloka odar, ta ashi.

Maneni pai Police Department dang asayar tajungtem nem mapa inyaktü atema maongka agütsütsü mepeshiba den tetushi agütsüba ya senotsü teyari agütsüba dang masü saka "nai merangdangbaji kanga tongtibang, nü nükjiong senti süa agir aser nai takok angubatem benjungtsü," ta osang ka agütsüba lir, ta ashi.

Kasa mapang nung tetushi tejaoker Nagaland DGP Rupin Sharma-i, state nung asaya balala asayatsü asoshi tejangraba aliba aser tetsükdaktsütem indang lemsatep. Saisabong ajanga taküm yimya azüoker ta shia pai asayartem career kanga tatsü asüba aser Nagaland nung private sponsorship maliba indang jembia liasü.

Maneni paisa, Nagaland Police-i yakta recruitment ayongzüka agütsü aser qualify sütetba asayartem nem tama maongka agütsütsü ta shia asayartem referee, coache aser trainer ama anisemtsü ajungshia liasü. Sharma-i, police force rongsenketzüng nung tetsükdaktsü ajuruba indang lemsatep, saka saisapong ajungkettsü atema maneni teyari agütsütsü nangzüka liasü.

Lenir anapronglai lanurtem dang parnok tashi saisapong nung intoktsü, sportsmanship tanüla ajungkettsü aser Nagaland ya linük nung sporting excellence teyongtsü ka kümdaktsütsü asoshi teyari agütsütsü ajungshia liasü.

Sentong ya YRS Director Kethosituo Sekhose lenisüba njung agi, Commissioner & Secretary YRS Anthony Ngullie-i lokti pela agizükba o jembi aser Additional Director Megolhou Dolie-i tepela o jembia liasü.

US Open: Sinner, Iga Swiatek, Gauff nungeri takok angu



Luroi/August 29, 2025 (Agencies): US Open tebur kija asaya tesüsabuba koker alisang Jannik Sinner-i Brehostoibarnü asaya koka pa tasembuba round-i iogo aser tetsür kija asaya nung Iga Swiatek aser Coco Gauff natia takok ngutetogo.

Top seed Sinner-i kanga junga asaya aser pai Australia nung asayar Alexei Popyrin 6-3, 6-2, 6-2 agi koka hard-court nung Grand Slam asaya 23buba atonga kokogo.

Sinner tasembuba round nung Canada nung asayar Denis Shapovalov den asayatsü. Sinner taküm Grand Slams asemprongla nung final tongogo. Pai Australian Open aser Wimbledon na kokogo aser

French Open nung Carlos Alcaraz sülen tanabuba jenjang nung liasü.

Tebur kija asaya nungsa Lorenzo Musetti-i Belgium nung asayar David Goffin akok aser Russia nung asayar Andrey Rublev-i America nung asayar Tristan Boyer kokogo aser pa taruba asaya Hong Kong nung asayar Coleman Wong den asayatsü.

Arishi küm 21 tain Wong ya qualifier ka lir shiba rank 173buba nung lir, pai tamamangtsüka kanga junga asaya Australia nung asayar 7-6 (7/5), 6-2, 4-6, 6-4 agi kokogo. Pa ya Hong Kong nungi tebur kija asaya nung Grand Slam asaya ka akokba mezüngbuba asayar kümogo.

Kasa mapang nung ninth seed Karen Khachanov-i Poland nung asayar Kamil Majchrzak 2-6, 6-7 (4/7), 6-4, 7-5, 7-6 (10/5) agi mekoki liasü.

Tetsür kija asaya nung 2022 US Open champion Iga Swiatek-i 6-1, 4-6, 6-4 agi Netherlands tsür Suzan Lamens kokogo.

Swiatek shibai Wimbledon aser Cincinnati na akokba sülen asaya 17 nungi 16 bo kokogo, la taruba asaya Russia tsür Anna Kalinskaya den asayatsü.

Maneni America tsür third seed aser 2023 champion Coco Gauff-ia kanga meranga asayar 7-6 (7/5), 6-2 agi Croatia tsür Donna Vekic kokogo. La tasembuba round nung Poland tsür Magdalena Frech den asayatsü.

Taoba US Open champion Naomi Osaka-ia 6-3, 6-1 agi America tsür Hailey Baptiste kokogo aser Ekaterina Alexandrova, Beatriz Haddad Maia, aser Linda Noskova nungeria pei tata asaya kokogo.

Fenerbahce-i Jose Mourinho mapa nungi anentsüogo

Luroi/August 29, 2025 (Agencies): Turkish SuperLig club Fenerbahce-i parnok indang head coach Mourinho mapa nungi anentsüba Hokolbarnü metetdaksüogo.


Fenerbahce pur Turkish Cup nung quarter-final stage nung tsükatok aser Europa League nunga round of 16 nung Rangers puri tsükdakja liasü.

Fenerbahce pur Champions League league nung asayatsü atema jenjang mongutetba sülen anogo ishika lir Mourinho mapa nungi anentsüogo. Parnoki playoff nung Benfica makok aser iba tetezü parnok iba season nunga Europa League nung asayatsü.

Istanbul nung amendaker aliba club yagi Portugal nung manager ya mapa nungi anentsüba osang jangjatsüogo, shiba dak club tejakleni aitsü atema kanga tamang ka liasü.

Club-i sangdong ka ajanga Mourinho dang kanga pelaba lemsatepogo. "Onok Jose Mourinho den pilaogo, shiba 2024-2025 season nungi club indang head coach liasü. Team atema pai meranga inyakba asoshi pa dang kanga pelar aser pa tarutsü takok nung aotsü imlaja atar," ta club sangdong ajanga metetdaksü.

Mourinho iba club nung



mapang tatsüka dang inyak saka pai inyakba kanga jangjaogo. International jenjang nung tajangshiba aliba aser pa tenüng tajung aliba maongka agütsü atema club-i pa anisema liasü.

Arishi küm 62 tain coach ya iba club nung 2024 küm July 1 nü aden. Pa lenisüba nung Fenerbahce pur asaya 62 asaya, koba parnok 37 akok aser 14 draw asü aser 11 mekoki liasü. Club nung pa indang average 2.02 liasü.

Mourinho, shiba taoba mapang Chelsea, Real Madrid, Manchester United, aser Roma indang coach liasü, pa Fenerbahce nung iba club ya domestic aser Europe nung takok ngua anitsü timla nung dena liasü.

Ajisüaka pai tang tashi nung takok kecha mongutet aser ibayongji pa club-i mapa nungi anentsüogo.

Asian shooting C'ships: Manini Kaushik-i bronze medal angu

Luroi/August 29, 2025 (Agencies): Asian Shooting Championships nung Hokolbarnü India tsür Manini Kaushik-i tetsür 50m rifle prone event nung bronze medal ngua la asoshi mezüngbuba international medal ngutetogo.

Arishi küm 24 tain Jaipur nungi asayar, shiba 50m rifle 3 positions nunga shilem agia liasü, lai point 617.8 nguteta bronze medal angu. Iba asaya nung South Korea tsür Hana Im-i (620.2) gold aser South Korea tsürsa Eunseo Lee-i (620.2) silver ngua liasü.

Manini ya pongububa nungang tembang saka la medal round-i ai, kechiyong South Korea tsür Yelin Choi (620.1) aser India tsür Sift Kaur Samra (617.9) na 'Ranking Points Only' (RPO) category nung asaya liasü. Iba format nung ranking points atema asayartem medal atema tokteptsü memelar.

Round trok nung terbenben akhaba sülen Manini-i 104.0, 103.8, 101.2, 103.3, 103.2 aser 102.3 ngua liasü.

Iba asaya nung lai kanga junga asayaba ajanga India team-i kasa asaya nung silver medal anguba nung teyari tulu agüja liasü. India tsür Manini (617.8), Surabhi Bharadwaj (614.4) aser Vinod Vidarsa (613.8) nung senteper point 1846 ngua parnok South Korea sülen tanabuba jejang nung tembang, shirnoki point 1856.8 ngua liasü. Iba asaya nung Kazakhstan (1828.2) team-i bronze medal angu.

Junior category nung India tsür Prachi Gaikwad-i tetsür 50m rifle prone nung silver medal nguogo. Lai point 616.6 ngua South Korea tsür Sehee Oh (618.6) sülen tanabuba jenjang nung tembang aser Kazakhstan tsür Sofya Malkina-i (616.3) bronze medal angu.

Prachi-isa, Anushka Thokur (607.6) aser Tejal Nathawat (599.2) den senteper team event nung bronze medal nguogo. Parnoki point 1823.4 angu. Team asaya ya South Korea-i (1844) akok aser Kazakhstan (1830.1) tanabuba jenjang nung liasü.

BILEMDANGANG

"Nü jenjang meleshitsü atema nü telemtetba dak keta lir."